

Na osnovu člana IV.4.a) Ustava Bosne i Hercegovine, Parlamentarna skupština Bosne i Hercegovine na __. sjednici Predstavničkog doma održanoj _____ 2009. godine i na __. sjednici Doma naroda, održanoj _____ 2009. godine, usvojila je

ZAKON O IZMJENAMA I DOPUNAMA ZAKONA O SLOBODI PRISTUPA INFORMACIJAMA

Član 1.

U Zakonu o slobodi pristupa informacijama („Službeni glasnik BiH“ broj: 28/00 i 45/06) iza člana 22. dodaje se novi Odjeljak VII. „Kaznene odredbe“ i novi član 22a. koji glasi:

„Član 22a.

Novčane kazne za prekršaje

(1) Novčanom kaznom u iznosu od 1.000 KM do 25.000 KM kazniće se za prekršaj nadležni javni organ:

- a) ako ne poduzme sve redovne mjere da prikupi zahtijevane informacije (član 14. stav (1));
- b) ako ne donese rješenje kojim obavještava podnosioca zahtjeva da je odobren pristup informaciji (član 14. stav (2) tačka a), b) i c));
- c) ako ne donese rješenje kojim obavještava podnosioca zahtjeva da je odbijen pristup informaciji (član 14. stav (3) tačka a) i b));
- d) ako prekrši rok iz člana 14. stav (3);
- e) ako naplaćuje naknadu ili taksu za podnošenje zahtjeva ili za pisane obavijesti (član 16.);
- f) ako ne imenuje službenika za informiranje, i ako ne dostavi Ombudsmenu ime i podatke za kontaktiranje službenika za informiranje (član 19.);
- g) ako ne dostavlja Vodič kojim se svakom licu omogućava pristup informacijama pod kontrolom javnog organa, zajedno sa uzorkom zahtjeva u pisanoj formi (član 20. tačka a));
- h) ako ne dostavlja Indeks registar vrsta informacija koje su pod kontrolom javnog organa, oblik u kojem su informacije na raspolaganju, kao i podatke o tome gdje se može pristupiti tim informacijama (član 20. tačka b));
- i) ako ne dostavlja Parlamentarnoj skupštini BiH i Ombudsmenu, kao i na zahtjev statističke podatke, po tromjesečnom prikazu, koji se odnose, ali nisu ograničene na broj primljenih zahtjeva, vrstu traženih informacija, utvrđene izuzetke, kao i odluke koje se donesu u toku postupka, te konačne odluke (član 20. tačka c));
- j) ako jednom godišnje ne dostavlja Parlamentarnoj skupštini BiH Izvještaj (član 20. tačka d))
- k) ako ne pruži pomoć kako je utvrđeno u članu 24. stav (1) i (2).

(2) Za prekršaje iz stava (1) od tačke a) do k) ovog člana kazniće se odgovorno lice u javnom organu u iznosu od 200 KM do 10.000 KM.

(3) ODJELJAK VII postaje ODJELJAK VIII.

Član 2.

U članu 24. dodaje se novi stav (2) koji glasi:

"Javni organi entiteta, kantona i općina dužni su pružiti pomoć javnim organima u BiH kada primjena odgovarajućih zakona o pristupu informacijama zahtijeva njihovu saradnju."

Član 3.

Ovaj Zakon stupa na snagu osmog dana od dana objavljivanja u „Službenom glasniku BiH”.

PSBiH broj _____/_____

Sarajevo

Predsjedavajući
Predstavničkog doma
Parlamentarne skupštine BiH
Beriz Belkić

Predsjedavajući
Doma naroda
Parlamentarne skupštine BiH
Dušanka Majkić

O b r a z l o ž e n j e

I USTAVNOPRAVNI OSNOV

Ustavni osnov za donošenje ovog zakona sadržan je u članu IV/4 Ustava BiH. On je nesporan, jer se radi o izmjenama i dopunama postojećeg Zakona o slobodi pristupa informacijama Bosne i Hercegovine.

II RAZLOZI ZA DONOŠENJE

Iako je Bosna i Hercegovina prva zemlja u regionu koja je usvojila Zakon o slobodi pristupa informacijama, ni nakon skoro devet godina rezultati njegove primjene nisu zadovoljavajući. Jedan od razloga zašto je to tako je što ne postoji mehanizam za efikasnu implementaciju Zakona, jer Zakon ne predviđa konkretne sankcije za prekršioce.

Zato je neophodno usvojiti ove izmjene, koje se odnose isključivo na uvođenje kaznenih odredbi za javne organe i odgovorne osobe u javnom organu, koje onemogućavaju ostvarivanje prava na pristup informacijama.

III OBRAZLOŽENJE PONUĐENIH RJEŠENJA

Ovim izmjenama postojećeg Zakona o slobodi pristupa informacijama BiH predviđa se kao sankcija novčana kazna u rasponu od 200KM do 25.000KM. Upoređujući zemlje u regionu uočeno je da zakoni o slobodi pristupa informacijama Slovenije, Hrvatske i Srbije poznaju ovakva rješenja, te navode različite novčane kazne, od najnižih 5.000 dinara (oko 125 KM) u Srbiji, do najviših 100.000 kuna (oko 27.000 KM) u Hrvatskoj, koliko je najviša propisana kazna za pravne osobe s javnim ovlastima koje suprotno Zakonu o slobodi pristupa informacijama onemogućavaju ili ograničavaju ostvarivanje prava na pristup informacijama.

IV USAGLAŠENOST SA ZAKONODAVSTVOM EU

Ponuđena rješenja u Zakonu apsolutno odgovaraju evropskim standardima u ovoj oblasti.

V FINANSIJSKA SREDSTVA

Za provođenje ovog zakona nije potrebno obezbijediti dodatna finansijska sredstva u budžetu institucija Bosne i Hercegovine.

Provođenjem ovog Zakona kroz naplatu kazni obezbijedila bi se dodatna sredstva u Budžetu.